

Escenario Bushiribana practicamente cla!



ORANJESTAD – Ayera mainta comision coordinando e preparacionnan pa cu nos pareha Real a tene un conferencia di prensa for di e localidad di Bushiribana cu lo bay ta un di e localidadnan particular cu lo wordo uza durante e bishita di e pareha Real pa por muestra nan e beyesa di nos nacion!

Les a pagina A2

Bushiribana den fase di transformacion pa un anochi di celebracion Royal!

ORANJESTAD – Ayera mainta comision coordinando e preparacionnan pa cu nos pareha Real a tene un conferencia di prensa for di e localidad di Bushiribana cu lo bay ta un di e localidadnan particular cu lo wordo uza durante e bishita di e pareha Real pa por mustre nan e beyesa di nos nacion. “Como tambe pa mustre nan con ‘out of the box’ nos por organisa eventonan aki na Aruba”, sr. Roel Samsom di oficina di gobernador a remarca. E preparacionnan ta andando ‘full swing’ pa e anochi di celebracion aki.

E idea tabata pa uza e ruina como parti di e decoracion di e escenario unda e show lo tuma luga riba e gran anochi aki. Segun Samsom, un di e cosnan importante ta cu nos a purba di inclui e ruina tambe como parti di e show. Lo no bay tin artistanan cu lo bay ta riba e ruinan pero loke nos a prepara ta un ‘video mapping’ unda lo proyecta e historia di e musica y baile di Aruba riba e ru-



inanan. E ambiente lo wordo ilumina cu luznan colorido di tal forma henter e ruina lo bay ta e decoracion di e show. “Manera nos a indica anteriormente Aruba ta e ultimo isla cu e pareha real ta bishitando y nos lo culmina e final cu un ‘bang’. Nos tin aki un area unda nos a tene presencia di mas o menos, 6-7 mil persona na cuenta y segun e tereno banda di mi akinan e por yena te cu 8 mil persona”, Samsom a bisa.

E ta sigui bisa cu a tene luga di parkeer na cuenta y den bista di esaki un plan a wordo traha unda esaki lo wordo regla via coordinadornan cu lo indica unda pa parkeer y tambe

percurando cu lo bay tin suficiente luz y seguridad pa a autonan. E area di ‘Natural Bridge’ lo wordo yena prome y tambe banda di ‘Ostrich Farm’ tin un tereno grandi cu tambe lo wordo prepara pa parkeer auto. Lo bay tin busnan cu lo hiba personanan for di nan luga di parkeer pa e ruina.

E celebracion ta uno gratis pa tur hende unda un y tur por bin celebra cu e pareha real. Bebida y cuminda ta disponibel na un hopi bon prijs, Samsom ta remarca, asina ta no tin mester bin cu boso mesun bebida y cuminda.

Mirando cu e localidad ta cer-

ca di lama, compania ALBO a yuda cu hekinan pa por cera e area di un manera mas sigur. Un plan di seguridad lo wordo ehecuto pa un compania priva di seguridad hunto cu KPA (Korps Politie).

Motibo cual tur otro entrada lo ta cera y lo wordo controla pasobra tur hende lo mester pasa via un entrada di control. Esaki ta pa segura e seguridad di tur hende presente como e pareha real.

Den caso cu awa mester yobe a planea dos escenario: “Uno, lo ta cambio di orario teniendo meteo na cuenta hopi di cerca, ya cu no lo por cubri un evento di miles di hende. “Si nos ripara cu riba dia 20 pa 12or di merdia cu tin un

menasa directo di un yobida nos lo hala e orario un ora y mey mas laat. Kiermen enbes cu nos ta cuminsa 6:30pm cu e show y portanan habri pa 6or nos lo habri e portanan 7:30pm y hala tur cos un ora y mey despues.

Y asina lo nos tin suficiente tempo pa pone tur cos na ordo y nos lo gewoon continua pasobra esaki ta un oportunidad unico pa muestra cu nos no lo kier perde. Otro escenario unda lo por tin yobida largo, e ora nos lo bay tin un problema pa por realisa esaki na e localidad aki y e ora nos lo palabra pa haci esaki den un sala cubri y lamentablemente lo nos perde un gran parti di

e intensidad,” Samsom a bisa

Segun Jonathan Vierra, kende ta coordina e ‘set-up’ di e magno evento aki, e luga lo wordo cera entrante diamars unda ya niun turista, grupo di tours y nada mas lo no por drenta e luga. Tocante inketudnan cu por existi tocante e edificio, Vierra ta splica cu e luga a wordo inspecciona pa DTI, Monumenten Fonds y ALBO kendenan a duna constestanan positivo.

Vierra ta remarca cu lo bay tin un ora y 15 minuut di show y rond di esey lo tin musica y entretenimento adicional pa tene e hendenan satisfecho. □